

Na osnovu člana 21. Zakona o zaštiti prava pripadnika nacionalnih manjina („Službeni glasnik BiH“, br. 12/03, 76/05 i 93/08), Parlamentarna skupština Bosne i Hercegovine, na 16. sjednici Predstavničkog doma, održanoj 3. februara 2021. godine, i na 15. sjednici Doma naroda, održanoj 10. februara 2021. godine, donijela je

ODLUKU

O VIJEĆU NACIONALNIH MANJINA BOSNE I HERCEGOVINE

Član 1.

(Predmet)

(1) Odlukom o Vijeću nacionalnih manjina Bosne i Hercegovine (u daljnjem tekstu: Odluka) utvrđuje se sastav Vijeća nacionalnih manjina Bosne i Hercegovine (u daljnjem tekstu: Vijeće) kao posebnog savjetodavnog tijela Parlamentarne skupštine Bosne i Hercegovine (u daljnjem tekstu: Parlamentarna skupština BiH), postupak izbora i imenovanja članova Vijeća, trajanje mandata, nadležnost Vijeća, organizacija i rad Vijeća, kao i druga pitanja značajna za rad i funkcioniranje Vijeća.

(2) Svi izrazi koji su radi preglednosti napisani u jednom gramatičkom rodu bez diskriminacije se odnose i na muškarce i na žene.

Član 2.

(Sastav Vijeća)

Vijeće čine po jedan predstavnik nacionalne manjine, u skladu s članom 3. Zakona o zaštiti prava pripadnika nacionalnih manjina („Službeni glasnik BiH“, br. 13/03 i 76/05).

Član 3.

(Postupak izbora i imenovanja članova Vijeća)

(1) Parlamentarna skupština BiH, na osnovu odluke Zajedničke komisije za ljudska prava Parlamentarne skupštine BiH (u daljnjem tekstu: Zajednička komisija) o pokretanju procedure izbora članova Vijeća, raspisuje javni poziv za imenovanje članova Vijeća, koji se objavljuje u sredstvima javnog informiranja.

(2) Prijedloge kandidata za članstvo u Vijeću dostavljaju registrirana udruženja nacionalnih manjina ili druge nevladine organizacije nacionalnih manjina.

(3) Kriteriji za izbor članova Vijeća su:

a) opći kriteriji:

1. kandidat mora biti državljanin BiH,
2. kandidat mora biti stariji od 18 godina,
3. kandidat mora biti član aktivnog udruženja nacionalne manjine kojoj pripada,
4. kandidat mora potpisati Izjavu o pripadnosti nacionalnoj manjini za koju se kandidira,
5. kandidat mora dostaviti Izjavu o odricanju od prava na članstvo u drugim vijećima nacionalnih manjina na bilo kojem nivou vlasti u Bosni i Hercegovini u slučaju izbora u Vijeće, s obzirom na to da kandidat ne može istovremeno biti član drugog vijeća nacionalnih manjina na bilo kojem nivou vlasti u Bosni i Hercegovini;

b) preporučeni/dodatni kriteriji:

1. kandidat treba poznavati ustavnopravni okvir Bosne i Hercegovine i međunarodne konvencije u domenu zaštite ljudskih prava i prava manjina,
2. kandidat treba imati praktično iskustvo u domenu zaštite ljudskih prava i prava manjina,
3. kandidat treba aktivno učestvovati u projektima i radu udruženja koja se bave pitanjima nacionalnih manjina,
4. kandidat treba uživati podršku aktivnih udruženja nacionalne manjine kojoj pripada. Udruženja koja predlažu kandidata prilažu i godišnji finansijski izvještaj za prethodnu godinu,
5. kandidat treba imati preporuku saveza udruženja nacionalnih manjina ako je udruženje kojem pripada član saveza.

(4) Na osnovu prikupljenih prijava, te uz nastojanje da se ispoštuje odredba člana 20. stav (2) Zakona o ravnopravnosti spolova u Bosni i Hercegovini („Službeni glasnik BiH“, broj 32/10 – prečišćeni tekst), Zajednička komisija utvrđuje prijedlog članova Vijeća koji dostavlja Parlamentarnoj skupštini BiH na usvajanje.

(5) Parlamentarna skupština BiH, na prijedlog Zajedničke komisije, imenuje članove Vijeća.

Član 4.

(Mandat članova Vijeća)

- (1) Mandat članova Vijeća traje četiri godine, od dana konstituiranja Vijeća.
- (2) U slučaju da mjesto pripadnika nacionalne manjine ostane upražnjeno, Parlamentarna skupština BiH može zamijeniti člana Vijeća iz iste nacionalne manjine, na prijedlog Zajedničke komisije. Mandat novoizabranog člana traje do okončanja mandata člana umjesto kojeg je izabran.

Član 5.

(Nadležnost Vijeća)

- (1) Vijeće daje mišljenja, savjete i prijedloge Parlamentarnoj skupštini BiH o pitanjima koja se tiču prava, položaja i interesa nacionalnih manjina u Bosni i Hercegovini.
- (2) Vijeće može delegirati stručnjake za rad u ustavnopravnim komisijama oba doma i Zajedničkoj komisiji kada one raspravljaju o pravima, položaju i interesima nacionalnih manjina.
- (3) Delegirani stručnjaci iz stava (2) ovog člana mogu biti pripadnici nacionalnih manjina, ali i nezavisni stručnjaci iz konstitutivnih naroda.

Član 6.

(Organizacija i rad Vijeća)

Organizaciju, način rada i druga pitanja značajna za izvršavanje nadležnosti Vijeće utvrđuje svojim poslovníkom koji ne smije biti u suprotnosti s poslovnicima Predstavničkog doma i Doma naroda Parlamentarne skupštine BiH.

Član 7.

(Sredstva za rad Vijeća)

- (1) Sredstva za rad Vijeća osiguravaju se u budžetu Parlamentarne skupštine BiH.
- (2) Troškove rada Vijeća utvrđuje Zajednička komisija za administrativne poslove Parlamentarne skupštine BiH, na prijedlog Vijeća.
- (3) Stručne i administrativno-tehničke poslove za potrebe Vijeća obavlja Sekretarijat Parlamentarne skupštine BiH.
- (4) Nadležni organi Bosne i Hercegovine dužni su, po zahtjevu Vijeća, pružiti sve oblike podrške koju traži Vijeće.

Član 8.

(Prestanak važenja)

Ovom odlukom prestaju važiti: Odluka o osnivanju Vijeća nacionalnih manjina BiH („Službeni glasnik BiH“, broj 38/06), Odluka o izmjenama i dopunama Odluke o osnivanju Vijeća nacionalnih manjina BiH („Službeni glasnik BiH“, broj 93/08), Odluka o izmjeni Odluke o osnivanju Vijeća nacionalnih manjina BiH („Službeni glasnik BiH“, broj 53/09) i Odluka o izmjeni i dopunama Odluke o osnivanju Vijeća nacionalnih manjina BiH („Službeni glasnik BiH“, broj 60/14).

Član 9.

(Stupanje na snagu)

Ova odluka stupa na snagu osam dana od dana objavljivanja u „Službenom glasniku BiH“.

Broj: 01,02,03/6-39-1-178/21

10. februara 2021. godine

S a r a j e v o

Predsjedavajuća
Predstavničkog doma
Parlamentarne skupštine BiH

Borjana Krišto

Predsjedavajući
Doma naroda
Parlamentarne skupštine BiH

Dr. Nikola Špirić